



**Diskursu husi**  
**S.E. Sr. Kay Rala Xanana Gusmão**  
**Primeiru-Ministru RDTL**  
**ba Parlamentu Nasional**  
**kona ba**  
**Proposta Lei Orsamentu Jerál Estadu nian**  
**ba**  
**Períódu Tranzisionál tinan 2007 nian**

**PARLAMENTU NASIONAL**  
**5 DE OUTUBRU 2007**

Excelência, Sr. Presidente Parlamentu Nasionál

Excelências, Senhores Membrus Parlamentu Nasionál

Excelências, Senhores Membrus Governu

Distintus Membrus Imprensa

Señoras ho Señores

Ohin, 4º. Governu Konstitusionál fo hakat tan ona ba oin atu bele hetan objetivus hirak nebé nia estabelese ona iha nia programa, nebé foin daudaun ne'e Parlamentu Nasionál aprova.

Orsamentu, nebé apresenta daudaun ba Parlamentu Nasionál, sei assiste/ajuda Governu, iha tranzisaun atu tama ba Siklu Orsamentál tuir Anu Sivíl i kobre de'it tempu fulan neen (6), sura hosi fulan Julhu to'o Dezembru 2007.

### **Anu Sivíl ho Tranzisaun**

Governu ida ne'e fiar katak siklu orsamental, ne'ebé bazeia ba anu sivíl, sei permite halo planeamento nebé diak liu no bele hetan execução diak ba planus sira.

Tuir loloos, Orsamentu tuir anu sivíl sei fó fulan sia, iha tempu bailoron, atu bele hala'o servisu nebé kintínuo, iha áreas krusiais hanesan:

- Fó assistênsia iha área agrikultura, tuir nia tempu, nebé lós;
- Harii sistemas irrigasaun no hala'o manutensaun;
- Harii sistemas bee moos no hala'o manutensaun;
- Halo ka hadia estradas bo'ot no nia manutensaun.

Prosesu lejislativu no administrativu tomak atu aprova orsamentus foun, sei hala'o iha fulan Outubru to'o Janeiro, nuné Ministrus sira sei iha tempu nebé naruk atu hala'o sira nia atividades.

Ida ne'e ezemplu ba dala uluk nian kona-ba reformas ne'ebé sei hala'o ba Finansas Estadu nian, hodi fasilita oinsá gasta osan atu servi ba ita nia povu no mos atu harii infraestruturas.

Altera orsamentu hosi anu fiskál ba anu sivíl, ne'e signifika katak ita tenke iha períodu tranzisaun ida. Orsamentu ida ne'e kobre períodu hosi fulan Julhu to'o 31 Dezembru tinan 2007. Prinsípius fundamentais, ne'ebé ami kaer atu elabora orsamentu ida ne'e, maka hanesan tuir mai ne'e:

- Kontinua fo serviços essenciais (educação, saúde, nst), ba povu Timór-Leste tomak;
- Asegura katak considera duni prioridades hirak ne'ebé urgentes no vitais/todan tebes;
- Fo prioridade ba deslokadus sira, ba hamenus kiak, no hadi'a condisoens seguransa;
- Implementa estrutura foun IV Governo Constitucional nian.

Ikus mai, ha'u sei koalia mós kona-ba medidas espesifikas ne'ebé Governu sei hatama iha orsamentu ida ne'e.

Ha'u hein katak Distintus Membrus Parlamentu Nasional sei compreende katak, ida ne'e, hatudu loloos katak, ami hakarak muda psikolojia Governu nian, iha nia operasoens tomak.

### **Reforma ba Operasoens Ministériu Finansas nian**

4º. Governu Konstitusionál sei haka'as-an atu hetan susesus, nebé bele haré, no sei sukat nia resultados, liu hosi número servisus ne'ebé sei hala'o, no mós ho infraestruturas sira ne'ebé sei harii. Ami sei hahú halo ida ne'e, hodi fó autonomia no fleksibilidade barak liu ba Ministrus sira, atu haree rasik sira nia orsamentus, hodi alkansa fin ida ne'e, katak hodi hetan duni resultados nebé diak.

Papél Ministériu Finansas krusiál tebes, iha processo atu bele hetan susesus, nebé ami iha cometimento atu hetan. Ami fiar katak Ministériu Finansas ne'e instituisaun ida ke iha duni kapasidade boot. Governu fiar katak papél prinsipál Ministériu Finansas mak atu supervizona jestaun ne'ebé diak no forti ba finansas públikas. Uluk, iha hanoin katak dalan mesak ida atu hala'o buat ida ne'e, maka tenke halo kontrolu sentralizadu ba pagamentus no transferênsias

osan hotu-hotu. Ita labele continua ho sistema ida né. Ita labele fo ba Ministeriu Finansas knar boot no todan atu haré ba buat hotuhotu husi Ministerius seluk, hodi hasai fali sentidu responsabilidade no prestasaun kontas hosi Ministrus sira, tanba sai hanesan obstákulu atu hetan rezultadus di'ak, ho relasaun ba despezas.

Governu desentraliza daudaun servisu balu ne'ebé baibain hala'o deit iha Ministériu Finansas ba iha áreas finanseiras Ministériu idaidak nian. Ida ne'e mudansa boot ida ba kultura/sistema nebé iha ona, maibé ami prontu ona atu hala'o duni.

Papél Ministériu Finansas mak atu jere de'it prosesu desentralizasaun finanseira tomak, atu asegura fó duni autonomia boot ba Ministerius sira hotu. Governo ida né lakohi katak frakasu/insucesso iha ezekeusaun orsamental bele mosu tan de'it surat ida lakon ka la mosu entre Ministériu ida ba Ministériu Finansas.

Desentralizasaun signifika katak, Ministrus sira sei hetan liberdade maibé signifika mos katak Ministérius idaidak mós sei hatán, sei responsabiliza ba kontas idaidak nian.

Lori tinan lima (5) atu Ministériu Finansas bele iha kbiit hanesan ohin loron, iha áreas Orsamentu, Aprovizionamentu/*Procurement* no Tezouru nian. Etapa krítika, ne'ebé sei tuir mai, kona-ba dezenvolvimentu institusionál, mak oinsá dezenvolve kapasidades iha liñas ministeriais ka iha Ministérius sira. Ministériu Finansas sei alkansa ida ne'e, liu hosi dalan boot rua, primeiru tenke devolve (fó fali) servisu balu ba Ministérius sira rasik, segundu oferese ajuda, formasaun no akompañamentu ba Ministérius hirak ne'e.

Pasu importante tolu maka sei foti, hanesan tuir mai ne'e:

- Desentralizasaun processo Formuláriu ba Kompromisu no Pagamentu (FCP) ka CPV ba Ministérius;
- Desentralizasaun prosesu aprovasaun ba transferênsia despezas hosi kategoria ida ba kategoria seluk, ba Ministérius; no\
- Desentralizasaun boot liu prosesu aprovizionamentu ba Ministérius sira.

## **Panorama kona-ba Ekonomia**

Distintos Deputadus sira,

Ha'u hakarak apresenta ba Distintos Membrus Parlamentu, panorama ka vizaun ida kona-ba ekonomia Nasaun nian. Liu ona tinan lima, maka Timór-

Leste restaura nia independênsia. Iha áreas barak mak Timór-Leste hetan avansus signifkativus, maibé, iha áreas seluk, partikularmente iha frente sosiu-ekonómiku, sei iha dezafius barak.

Pobreza/kiak, sai hanesan dezafiu todan ida, i estudus ne'ebé halo tiha ona, hatudu katak populasaun ne'ebé moris iha linha pobreza nia ókos, katak sira nebé, loroloron, moris ho \$0.55, bele liu pursentu hatnulu resin ida (41%), ne'ebé identifika tiha ona iha tinan 2001. Dezempregu ba jovens sira aas tebes, i ida ne'e maka sai mos factor ida ba violênsia no instabilidade social.

Ita prevê katak, iha tinan lima mai ne'e nia laran, ema liu rihun nenulu resin lima maka sei tama tan hanesan população activa, katak bele servisu ka buka servisu. Pelumenus, iha tinan 2006, ema liu rihun sanulu tama tiha ona hanesan populasaun activa ka populasaun nebé bele kaer servisu.

Problema kona-ba dezlokadus sira, sai hanesan mós dezafiu sériu tebes. Agrikultura domina ekonomia Timór-Leste, no sai nudar meios ba ema barak liu nia moris loroloron nian. Sektór ida ne'e hetan 30% hosi Produutu Internu Brutu, la konta ho petróleu. Serka de 80% hosi ita nia populasaun, depende ba sektór agríkola no peskas iha sira nia buka moris loroloron nian.

Um tersu hosi famílias, iha ita nia Rain, aguenta moris de'it ho agrikultura. Iha desigualdade boot tebes, kona ba acesso ba saúde no educação, entre mane ho feto no mos entre áreas urbanas no rurais. Taxa mortalidade infantil, ba labarik sira tinan lima ba kraik, bele to'o atus ida tolunulo iha rihun ida ne'ebé moris, no mortalidade materna mós ás tebes, bele to'o ema atus nen resin nenulu, hosi ema/feto tokon ida ne'ebé fo horis.

Populasaun rural mos hetan susar barak iha sira nia moris loroloron, tanba depende de'it ba kondisoens ne'ebé hale'u sira, nebé mos hetan estragos no mós ba mudança klima, nebé hotuhotu hatene.

Em termos gerais, iha tinan 2006, ita haree katak ita hakiduk oitoan, i Produutu Internu Brutu, nebé la mai husi petróleu, tuun to'o nível iha tinan 2000 nian. Mezmu nune'e, ita fiar katak ita nia ekonomia komesa buras fali ona ho rekupersaun uitoan durante tinan 2007, tanba kombinasaun hosi faktore balun hanesan, primeiru atividades NU nian nebé aumenta iha fulan hirak ne'e no kondisoens klima ne'ebé di'ak.

Distintus Deputadus sira,

Orsamentu ba períodu tranzisaun, mezmuke ba deit tempu badak ida, buka atu kaer nafatin servisus hirak ne'ebé Governu hala'o iha áreas saúde, edukasaun

no sosiál nian, no mós atu fo impulsu inicial nebé fo impacto ba ekonomia, hodi nune'e bele kria bases ba Segundu Planu Dezenvolvimentu Nasionál ba Tinan Lima nian.

Atu hatutan tán, ami hakarak atu hasa'e níveis despezas públikas no incentivadiak liu tán investimentu estranjeiru diretu, nebé sei lori ba rekuperasaun sustentada.

Dezafiu boot liu hotu ne'ebé Governu ne'e enfrenta, maka oinsá dezenvolve lailais ita nia infraestruturas bázikas. Estratéjias hosi Governu, mak atu aselera kreximentu ekonómiku no kria tán servisu hanesan meu importante liu atu hamenus kiak no hasa'e bein-estár ekonómiku.

Experiênsia hosi Nasoens seluk, hatudu ba ita katak kreximentu ekonómiku mak faktór importante liu hotu, ne'ebé bele influensia rezultadus kona-ba redusaun pobreza.

### **Jere verbas tranzitadas (Carry over)**

Disitintos Deputados sira,

Antes de ha'u tama ba iha detalhes kona-ba orsamentu, ha'u hakarak explika ba Distintos Deputados Parlamentu Nasionál kona-ba kondisaun verbas tranzitadas hosi orsamentu tinan hirak liubá nian.

Bainhira Governu ida ne'e hahú servisu, hetan informasaun hosi autoridades sira iha Ministériu Finansas, katak verbas tranzitadas ka osan ne'ebé la gasta, to'o kuaze \$119m, i barak liu mai hosi kontratus sira nebé asina, iha último trimestre, katak, husi fulan Abril, Maio no Junho 2007.

Númeru boot ida ne'e, kuaze barak liu dala tolu, kompara ho osan ne'ebé resta iha tinan uluk, Julho 2005 to'o Junho 2006, i atu barak hanesan fali nível despeza real ba tinan 2006-07.

Verbas tranzitadas ka carry over boot hanesan ne'e, buat ida ke insustentável liu, maibé Governu labele hakotu kompromisus hirak ne'ebé halo tiha ona, ne'e duni ami sei buka, ho boa-fé, desloka fundus ba ida né. No entanto, ami sei hala'o asoens, atu reduz tiha montante ida ne'e, molok tinan ida ne'e remata. Paus ne'ebé Governu atu hola hodi hamenus carry over ne'e, mak hanesan tuir mai ne'e:

- Ministériu Finansas sei buka ható'o, iha tempo nebé diak, relatórius mensais kona-ba ezeekusaun orsamental, ba Parlamentu Nasionál no partes interesadas seluk, atu hatudu nível réal husi orsamentu rasik, nune'e mós osan ne'ebé mai husi carry over, tuir Ministériu ida-idak no tuir kategoria despezas;
- Ministériu Finansas sei taka lailais kedas kompromisus hotu ne'ebé relasiona ho projetus no atividades ne'ebé halo hotu ona, maibé saldu seidak taka;
- Governu sei taka lailais 'carry over' sira hotu ne'ebé seidak afetus;
- Ministériu Finansas sei haree di'ak fali kontratus hotuhotu, atu verifika se iha duni obrigasoens kontratuais, i se la iha, sei taka obrigações sira né no taka mos montantes 'carry over' nian; i
- Ami hanoin atu taka montantes 'carry over' nian hotu, to'o iha 31 Dezembru 2007, hodi nune'e, sira nebé haré katak bele duni ou tenki duni, sei hatama ba orçamento tinan 2008.

Atu problema hanesan ne'e la bele mosu tán, Governu sei adopta métodu Kaixa ba iha Orsamentu Jerál Estadu nian iha tinan 2008. Projetus kona-ba kapital sei hetan dotasaun, tuir abordagem hanesan ne'e:

- Exequibilidade, katak bele halo;
- Konsepsaun; no
- konstrusaun

Abordajem ida né realista no adequada liu ba dezvoltimentu Nasaun nian, nebé permite ita atu uza rekursos financeiros, no eficiente ho efectiva duni.

Iha contexto ne, mak ha'u mai apresenta ba Parlamento Nacional, Orsamentu Estadu nian ba período transisaun.

## **Reseitas**

Señor Prezidenti Parlamentu Nasionál  
Distintus membrus Parlamentu Nasionál

Total reseitas ba períodu tranzitoriu, hosi dia 1 Julhu to’o 31 Dezembru, kalkula to’o dolares \$579 milhoens dolares, i hosi montante ida ne’e, dolares \$556 milhoens dolares mai hosi reseitas petróleu nian, i restu mai husi fontes não-petrólíferas. Rendimentu sustentável ba períodu tranzisaun, hosi dia 1 Julhu to’o 31 Dezembru, maka dolares \$133 milhoens i ha’u bele explika: Lei Fundo Petrólífero permite/autoriza Governo ida né bele hasai doláres \$133 milhoens dolares né. Orsamentu ida né, menus liu dook valór ida ne’e ba.

### **Défise Fiskál no Fundu Petróleu**

Saldo husi Fundu Petroleu, iha dia 30 Junhu 2007, mak dolares \$1.394milhoens dolares. Iha finál tinan 2007, kalkula katak saldo Fundu Petroleu nian sei to’o dolares \$1.910 milhoens dolares, hodi hanoin katak sei hasai dolares \$40 milhoens dolares hosi Fundu, durante períodu tranzisaun. Ita hein katak Fundu Petróleu ne’e sei aumenta gradualmente iha medio prazo. Previzaun atuál hatudu katak valór totál Fundu Petróleo nian, to’o tinan 2008, maka dolares \$2.906 milhoens dolares i, iha tinan 2011, sei ba to’o \$5.550 milhoens dolares.

Défise fiskál, katak diferença entre despesas no reseitas naun-petrólíferas, kalkula ona to’o dolares \$85,7 milhoens dolares. Governu sei taka défise ne’e ho osan \$40 milhoens dolares, nebe mai hosi Fundu Petróleu, no restu mai hosi osan ne’ebé hasai hosi Konta Tesouru Estadu nian. Ne dúni, husi dólares \$133 milhoens dolares, Governo sei hasai deit dolares \$40 milhoens dolares.

### **Finansiamentu ba Operasoens Bázikas Governu nian**

Governu halo orsamentu nebé adekuaudu ba nia nesesidades bázikas. Orsamentu ida ne’e halo tuir prinsípiu katak, tenke fó ba Ministérius sira, metade hosi orsamentu anu 2006-07, atu mantem nesesidades operasionais Governu nian, no mos bele presta serviços basicos ba populusaun tomak.

Baze ida ne’e estabelese, ho kalkulu ba metade husi orsamentu tinan 2006-07 ba salárius, beins i servisus. Orsamentu baze hetan \$85.1 milhoens dolares i sei hatán ba servisus hirak ne’ebé hala’o ona tuir rejime duodesimos, hahú husi 1 Julhu i sei kontinua hala’o to’o 31 Dezembru 2007.

### **Medidas Foun ne’ebé Governu hola**

Distintus membrus Parlamentu Nasional

Nune’e, Governu define ona medidas, hanesan:



- Poupa osan;
- Halo dotasoens ba osan ne'ebé la afetu ba fornecedor sira; i
- Finansiamentu ba nesesidades imediatas.

Nesesidades imediatas hirak ne'e atu hodi:

- Asegura katak atende duni prioridades urjentes no críticas/boot;
- Asegura katak fo duni atensaun ba deslokadus sira, ba hamenus pobreza no hametin seguransa; i
- Implementa estrutura foun 4°. Governu Konstitusionál nian.

Governu adopta medidas foun ho total \$23.2 milhoens dolares, ne'ebé halo parte Orsamentu Geral ho total \$112.303 milhoens dolares, hosi 1 Julhu to'ó 31 Dezembru 2007.

Agora, ha'u sei buka apresenta ba Ita Boot sira, medidas balun.

Governu iha consciencia luan, katak presiza hametin seguransa iha Dili no iha Rai laran tomak.

Iha fulan hirak mai ne'e, Governu hakarak kria ambiente ida nebé, ema hotu-hotu ne'ebé moris ho kondisoens umanitárias difísil tebes, rezultadu hosi situasaun oioin ne'ebé halo susar boot ita nia Nasaun, atu sira bele fila ba sira nia uman rasik. Governu sei assiste sira ho meius ne'ebé sira presiza, atu nune'e sira bele hadi'a fali sira nia moris.

Atu hahú ho processo ida nebé complexo tebes, nebé sei exige dedikasaun tomak husi Instituições Estado nian hotu, Governo ida né hakarak iha prazo nebé kiik, fò:

- Assistênsia ba deslokadus (IDPs), liu hosi Ministériu Solidariedade Sosiál;
- Ekipamentu ba PNTL atu asegura katak sira bele komunika ba malu hodi bele responde lailais i ho metodos nebé profissionais;
- Harii tán estasoens PNTL nian no postus iha fronteira i ofinas atu comunidades tomak bele sente laran hakmatek iha sira nia fatin.

Governu hakarak atu kontribui barak liu ba dezvoltimentu komunitariu, husi osan \$206.000 dolares nebé fahe ba Chefes de Sucos ho osan \$104.000 dolares ne'ebé fahe ba Administradores Distrito sira.

Xefe Suku sira presiza rekursus barak atu bele dezvoltolve idaidak nia comunidade, liuliu harii sentru comunidade, hodi envolve ema hotu. Nune'e, comunidade sei halo rasik avaliasaun kona-ba nia nesidades prinsipais i sei promove dezvoltimentu lokal ida ke responsavel, hodi bele hetan rendimento no fó servisu ba ita nia jovens sira.

Governu sei fó subvensoens públicas ba Igreja no Organizasoens Naun-Governmentais seluk to'o \$785.000 dolares, tanba grupus hirak ne'e maka bele halo servisu ba comunidades, iha fatin ne'ebé Governu rasik la konsege halo.

Governu sente iha obrigasaun atu finansia servisu, maibé la haree nia-an hanesan nia deit mak bele hala'o ida né, tan ne'e karik iha ema seluk maka bele halo servisu di'ak liu ami, ami sei la iha duvida atu ajuda sira hodi hala'o servisu ne.

Ita nia populasau barak liu maka moris hosi agrikultura subsistênsia, tanba ne'e mak ita presiza oferese servisu nebé diak liu ba sira. Durante período tranzisaun, Ministériu Agrikultura no Peskas sei hetan fundus adisionais to'o \$225.000 dolares ba reflorestasaun no kuida ai-horis, osan \$105.000 dolares atu hola vacinas ba animal sira, no \$345.000 dolares atu fo apoio mecanizado ba agrikultores sira.

Goerno mós sei assiste peskadores sira, no sei dezvoltolve akuakultura, ba ida ne'e Ministériu Agrikultura no Peskas sei simu osan adisionál \$175.00 dolares hanesan fundu atu sosa ekipamentu hanesan redes, motór ba beiro no mós hahán ba ikan, hodi dezvoltolve viveiros ikan nian.

Governu hakarak cria solusoens lais, atu fó servisu ba jovens sira, nune'e sei kontinua ho projetus ne'ebé hatudu ona katak iha duni valór, hanesan “ cash for work” , ba tempu badak nian, no liuliu atu harii no halo manutensaun ba infraestruturas kiik iha comunidade sira nia leet. Ami sei habelar tán programa ida ne'e, ho osan \$1.2 milhoens dolares.

Iha tinan oin mai, Governu sei komesa prepara Planu Dezvoltimentu Nasionál, hodi atualiza tiha ida mai hosi tinan 2002. Ida ne'e sei hetan suporte hosi projetu planeamentu ekonómiku, ne'ebé adekua ba nesidades reais Nasaun nian, hodi dada hamutuk projetus barak ne'ebé dezvoltolve tiha ona,

maibé la iha koordinasaun, atu cria quadro desenvimentu nian ida, ke hametin unidade nasional iha niveis hotu-hotu: ekonómiku, sosial, administrativu no político. Ami sei finansia parte inisial, atu halo atualizasaun Planu Desenvimentu Nasionál ho osan \$200.000 dólares.

Medidas importantes seluk tán hosi Governu mak:

- Task Force ba Luta Anti-Pobreza, iniciativa hosi Prezidente da República, nebé sei fo ba Prezidente kbit atu kumpre plano boot ida husi nia mandato, kona-ba redusaun pobreza;
- Kontinua ho Programa Seguransa Alimentár, ho osan \$3.9milhoens dolares;
- Halo estradas prinsipais, pontes, hadi'a bee dalan hodi satan netik bee, liuliu atu recupera estradas: Zumalai-Suai-Salele; Betano-Natarbora; Lourba-Zumalai, Laclubar-Natabora; controlo bé ba mota hitu; atu halo projecto kona ba ponte Karau Ulun no Bemós, ho osan total \$2.4milhoens dolares;
- Subsídium ba manutensaun no operasaun Ró Nakroma, atu ita nia populasaun bele ba-mai nafatin, ho osan \$353,000 dolares.

Ikus liu, ita presiza restrutura Servisu Públiku, atu nune'e bele armoniza ho 4º Governu Konstitusionál. Departamentus foun balu no divizoens, ne'ebé iha estrutura foun, inklui mós Gabinete Primeiru Ministru, Solidariedade Sosial, Infraestruturas, no Comércio, Indústria i Turizmu, presiza rekursus adekuadus atu asegura sira nia funcionamentu halo didi'ak.

Excelencia, Senhor Presidente Parlamento Nacional  
Distintus Membrus Parlamentu tomak

Orsamentu ida ne'e hanesan primeiru pasu, iha jornada nebé naruk atu hetan paz ho prosperidade, hodi começa daudaun implementasaun ba programa Governu nian, ne'ebé Parlamentu ida ne'e aprova tiha ona. Inklui mós medidas lubun ida, atu hadi'a situasaun ba Timóroan tomak.

Ha'u mós komprende katak iha problema boot rua, maka mosu wainhira ita debate kona-ba orsamentu iha loron hirak liubá. Ida mak kona-ba pensoens ba veteranus sira i ida seluk mak assistênsia ba IDPs (deslokadus ) sira.

Ha'u hakarak aproveita oportunidade ida ne'e atu garante ba distintus Membrus Parlamentu Nacional, katak kestaun rua ne'e la'ós de'it hanesan prioridade boot liu ba Governu AMP, maibé hanesan kestaun ne'ebé, se ita hakarak rezolve, ita

tenke ho kuidadu boot tebes, atu nune'e bele asegura katak bele hetan duni solusoens duradouras.

Kona-ba kestaun pensoens ba veteranus, tanba ha'u rasik duni maka hahú, mezmuke hasoru dificuldades barak no ho rekursos nebé oitooan liu, ha'u konsege duni harii komisoens tolu, ne'ebé bele halo rejistu ba potenciais veteranus Rezistênsia nian, relátoriu ida ne'ebé uluk, ha'u nuudár Prezidente Repúblika, apresenta ba Parlamentu, iha tinan 2004.

Hanesan rezultadu, mak Parlamentu Nasionál komesa kedas diskusoens kona-ba Lei ba Estatuto Combatentes Libertasaun Nacional, ne'ebé mós regula kona-ba pensoens ba veteranos no martires libertasaun nacional, ho tipo tolu: pensão especial subsistencia, pensão especial reforma ba combatente veterano sira, no pensão sobrevivência, hodi mos fo subvenção por dedicação exclusiva.

Lei ne'e regula kona-ba kritéria elijibilade, inklui mós husu detalhes críticos/dificéis, nebé, uluk, la hatama iha formuláriu ba rejistu, nebé halo iha tinan 2004. Prioridade ida ba Governu, maka atu haree halo di'ak ba detalhes hirak ne'e atu asegura katak Veteranus sira hotu hetan duni pensoens justas.

Nune'e mós, Governu ida ne'e prepara política ne'ebé presiza no kritérius, ne'ebé bele garante katak Veteranus sira hetan duni justa rekompensa, tuir sira nia kontribuisaun iha luta ba libertasaun nasional. Ida ne'e bele ona explika, tanba-sá iha orsamentu ba periodo tranzitoriu ida ne'e, la iha montante espesífiku ida ne'ebé aloka kona-ba pensoens ba veteranus sira. Governu sei hatama ida ne'e iha orsamentu ba anu sivíl 2008, no pensões sira sei konta hahú husi tinan 2000.

Kona-ba IDPs, Governu kompromete ona atu rezolve kestaun todan ida ne'e ho maneiras ne'ebé responsáveis, prudentes i onestas. Hanesan ema hotu iha Salaun Nobre ida ne'e hatene ona, kestaun ida ne'e, ne'ebé dada naruk liu tinan ida ho balu tiha ona, problema ida ke komplikadu tebes, i presiza haree ho sensibilidade atu asegura katak iha tratamentu nebé justo ba idaidak no ba ema hotu.

Depois de simu posse iha 30 Agostu, Ministra Solidariedade Sosiál tau kedas kestaun ne'e hanesan nia prioridade. Nia hala'o reunioens barak, inklui ho Deslokadus sira rasik atu identifika solusoens ba tempu naruk nian, ne'ebé ema bele simu.

Durante diskusoens, sujestoens lubun boot ida mak identifika tiha ona, maibé, atu implementa, tenki fo dadus konkretus duni, liuliu bain-hira atu halo orsamentu ne'ebé presiza.

Infelizmente, Governu ida ne'e deskobre katak la iha dadus, atu bele ajuda Governu hodi kalkula osan ba orsamentu, hodi nuné hetan solusoens, maski Organizasoens barak duni mak halo servisu iha ka ho IDPs sira. Tanba ne'e, mak Governu, iha reuniaun ida iha Konsehu Ministrus, husu atu Ministra Solidariedade Sosiál resolva uluk liu ba problema dados nebé ita bele fiar, atu bele ajuda Governu hodi aloka orsamentu apropriadu ba tinan 2008.

Nune'e, Orsamentu ba períodu tranzisaun ida ne'e, inclui mos ona fundus balu ba atividade ida ne'e, no mós tau matan ba nesesidades emerjênsia ne'ebé sei mosu iha tempu udan.

Atu remata, ha'u hakarak hatete katak tuir Artigos 95°, 97° no 145° Konstituisaun Repúblika Demokrátika Timór-Leste, Governu nia obrigasaun maka submete Lei ba Orsamentu Jerál Estadu nian, atu hetan konsiderasaun no aprovasaun hosi Parlamentu Nasionál.

Kuartu Governu Konstitusionál fiar katak Orsamentu ba períodu tranzisaun ne'e, sei hanesan motór arranke importante ida atu nune'e Governu komesa servisu hasoru dezafius oioin. Ami la'ó ho optimizmu, atu konkretiza ami nia programa i ami sei halo buat hotu atu bele implementa.

Obrigadu.